

東華續錄

東華續錄

道光八

臣王先謙敬編

臣周潤蕃恭校

秋七月戊辰史致光以疾免以陸以莊爲左都御史

由署吏部右侍郎遷

○辛未以敢在勤政門外向軍機大臣等

爵○庚辰以直隸霸州等十州縣被淹較重飭撥銀米先行撫恤○飭山那清安將太監曹進喜面訊據壬午撥京倉米五萬石給五城平糶○癸未免直隸嘉慶十八年軍需攤期不換伊須查問並欲向兵部諭內廷向存各省道府名單以備查閱朕因歷年已久不符者居多將名單另鈔一分面交軍機大臣等諭令查明更換並未向奏事處太監等提及一字乃曹進喜妄逞己見輒敢在勤政門外向軍機大臣等查問聲稱吏部疲玩詞色俱厲經軍機大臣等面奏朕特派縣課汪廷珍那清安將太監曹進喜面訊據曹進喜供認係伊自出主見令吏部開單送伊閱看並欲定以期限如到期不換伊須查問並欲向兵部堂官要武職各冊等語我朝列聖相承家法極爲嚴肅太監不過供宮廷灑掃奔走之役從不許干預朝政所以杜漸防微者至深且遠曹進喜在內廷豢養多年於伊職分內不應辦之事輒敢越分干預出言無狀實屬狂妄可惡之至此風斷不可長曹進喜著革去五品總管交乾清門總管太監重責二十板另派差使並將此旨載入宮中見行則例○分設京城外蘆溝橋四處飯廠並飭直隸被水各州縣設

廠養賑○丁亥諭載銳係成哲親王之嫡曾孫著襲封成郡王縣懷係成哲親王之庶子已封爲二等鎮國將軍縣總亦著加恩晉爲二等鎮國將軍以示朕篤念本支惇敘懿親至意○直隸總督蔣攸銑奏請速撥大賑經費得旨直省連年水潦皆朕不德不能上感天和致我無辜赤子荐受災荒何忍觀此景象惟有返身修己盡力拯濟庶救顛沛之危但國家經費有常雖重帑用之於百姓原不稍爲吝惜若令奸胥猾吏趁機吞取則大不可卿受國家任用厚恩且才能素著任事實心必須妥爲經理俾災黎均霑實惠奸猾不得侵漁斯爲不負委任而朕用人亦光顏而矣勉之又勉○戊子移安徽潁州府驛口橋捕盜同知駐艾亭集爲撫民總捕同知並增把總一改前裁之鳳陽府司獄爲巡檢並增外委一均駐宿州時村集增潁州營方家集亳州營張村鋪宿州營夾溝驛外委各一○己丑撥部庫及各關稅銀一百八十八萬兩備直隸賑需並永定河工需○河南漳河溢○庚寅諭御史趙柄奏請敕停各省停止分發佐雜人員一摺向來佐雜等官因部中銓選較難照例分發各省試用挨次輪補嗣以歷年分發旣多各該者人浮於缺日形壅滯節經直隸山東河南山西陝西江蘇等省奏請暫停分發均已降旨准行原因該員等一經分發在省差委各督撫隨時甄覈其流品才具固所深悉補缺後旣得及時自效亦可造就人材將來漸次疏通仍照常辦理並非使各省遞相倣效永遠停止若如該御史所奏令各督撫設法調劑不得請停分發是佐雜等選期本屬遙遠分發到省又復擁擠至數百人之多守候至數十年之久旅進旅退

得缺無期甚非所以恤微末而權銓政也所奏著無庸議○壬辰諭國家設官分職內外並重外省道府州縣等官固有察吏安民之責在京各部院司員綜覈外省奏咨事件政務殷繁亦須明幹勤慎方資治理乃近年以來各省督撫率請將衰庸之員以京職改補將來人數增多必致庶司曠誤於吏治大有關係嗣後外任道府以下知縣以上各官如有才具平常及年老衰邁者著該督撫等遵照定例甄別改簡降補及勒令休致槩不得奏請以京職改補儻違例請改該部卽奏明更正仍將該督撫照例議處其從前改補京職各員並著各該堂官留心察看如有衰庸不能勝任者卽隨時激汰不得稍事姑容至因病解退之外任官員病痊起補時槩不准呈請改補京職以歸畫一○諭軍機大臣等原任直隸水利營田觀察使陳儀著有直隸河渠志於畿輔諸水沿波討源而於永定河議論尤詳又據御史余文銓將陳儀文集進呈內載文安河隄事宜四河兩淀私議永定引河下口私議治河蠡測篇似有所見陳儀籍隸文安又身預水利諸事於畿輔水性地形知之較悉惟自雍正年間迄今幾及百年其閒水道通塞分合或不免今昔之殊而援古證今足資採取朕前派張文浩等會同蔣攸銛將南北運河並永定大清漳沱各河情形悉心查勘通籌全局近又命張文浩會同蔣攸銛辦理永定河堵築事宜特發去直隸河渠志一冊及陳儀文集直隸河道事宜一本著蔣攸銛等詳悉查閱以備考證該督等務須酌古準今計出萬全以副朕講求水利保衛民生之至意○癸巳命五城先期兩月開廠煮賑○改廣西平樂府通判爲平樂

縣縣丞駐沙子河○乙未以江蘇水災免各關商米稅銀○丙申免河南應攤川楚及衛案軍需銀四百六十餘萬兩○是月給江西德化縣湖北黃梅縣江蘇太倉等十七州廳縣水災一月口糧加賑直隸通州等二十一州縣水災

八月丁酉朔再截撥江西九江等三幫漕米備直隸賑需○戊戌諭本日據吏兵二部奏請酌定失察鴉片煙條例鴉片煙一項流毒甚熾總由地方官查拏不力所致向來地方官止有嚴參賄縱之例並無議處失察之條且止查禁海口洋船而於民間私熬煙片未經議及條例尙未周備嗣後如有洋船夾帶鴉片煙進口並奸民私種罌粟煎熬煙膏開設煙館文職地方官及巡查委員如能自行拏獲究辦免其議處其有得規故縱者仍照舊例革職若止係失於覺察按其煙片多寡一百斤以上者該管大員罰俸一年一千斤以上者降一級留任五千斤以上者降一級調用武職失察處分亦照文職畫一辦理其文武官拏獲煙斤議敘均著照舊例行至滇省迤西迤東一帶將罌花熬爲鴉片必須嚴爲禁止著該督撫嚴飭地方官曉諭居民不准私種罌粟以淨根株○己亥初舉經筵 上詣 傳心殿行禮 御文華殿經筵幸文淵閣賜講官及聽講諸臣茶復賜宴於本仁殿自是以爲常○庚子命孫玉庭委員採買四川湖廣江西米石備安徽災區平糶○癸卯復松筠頭品頂帶○乙巳諭軍機大臣等御史程喬采奏直隸貧民出口謀生請敕各關口詢明來歷放行一摺所奏甚是向例民人出口憑票放行原以杜奸匪而嚴管

鑄至遇饑饉之年貧民車載糶負或依倚親族或出口傭趁亦屬事所恒有從前乾隆嘉慶年間辦理荒政俱聽其出口謀生係一時權宜之政此等窮黎勢不能紛紛請票但當問明來歷並詢其將往何處投止卽行知所往地方俾得有所稽覈本年直隸災區較廣如該御史所奏風聞各處關口留難向阻一槩不准放行該民人甫抵關門又復長途紆折其情極爲可憫該督接奉此旨卽迅速行知直隸所屬各關口除商賈行旅及形迹可疑之人仍照舊例驗票放行外其實係覓食災民止須問明來歷以備稽查毋得槩行攔截俟來歲春融情願回籍耕種者卽任其復業可也○壬子諭軍機大臣等前據蔣攸銑片奏此次恭辦大差未便仍照往年借資民力見給發銀兩敬謹辦理至冬春需用車輛係取自民間州縣不能全數賠墊亦應量予津貼共需銀十萬兩先於運庫生息項下借墊分年攤廉歸還等語已批示依議妥辦矣朕思力役之徵從古所有我朝自 聖祖仁皇帝以來 列聖相承凡遇謁 陵及熱河秋獮巡幸盛京恭謁 祖陵諸大典或每歲舉行或閒歲舉行皆不能不借資民力卽閒有偏災如嘉慶六年之水我 皇考仁宗睿皇帝於此年七月仍舉行熱河秋獮之典彼時未聞累及閭閻亦未有借墊捐廉之事誠以直隸民賦本輕偶遇災荒則蠲緩賑恤有加無已厚澤深仁至優極渥卽偶用民力亦分所宜然本年直隸被水朕恫瘝在抱不惜帑金發給至一百八十萬兩之多截留漕糧前後共五十五萬石又撥奉天粟米十五萬石軫念民依不爲不厚若如該督所奏竟不借資民力於庫項先行撥墊攤廉還款是

廢力役之徵並未從長計較試思各官養廉爲數無多如每差必扣勢必致無廉可領辦公竭蹶成何政體且此後謁陵秋獮必應次第舉行該省地方官無廉可扣又將以何項攤捐且庫項亦不能源源接濟所謂惠而不知爲政朕不料蔣攸銛亦復如此蔣攸銛所奏是否體察本年被災情形權宜辦理抑遂欲援爲成例摺內並未詳悉聲敘殊屬含混此次姑從所請依議妥辦斷不可通行貼示以致日後扞格難行蔣攸銛接奉此旨須通盤籌畫務思朝廷大體經久可行毋爲目前之計此後宜如何設法籌辦方妥之處著卽明白覆奏尋奏借款辦理大差係體察被災情形權宜辦理報聞○甲寅命蘆溝橋等四廠外添設二廠並折米散放○乙卯以浙江杭州等三府屬水災免海運商米船稅並留各關稅銀備賑○是有賑安徽無爲等十六州縣水災給河南濬縣等十三縣水災一月口糧並修屋費江蘇江浦等六縣水災一月口糧緩徵河南武陟等十五縣水災電災新舊額賦湖北黃梅縣水災錢糧展緩河南蘭陽等三縣歉收新舊額賦並儀封應灘租

九月丁卯撥浙江鹽庫銀三十萬兩買米平糶○戊辰諭蔣攸銛奏請派員查勘紅花隄缺口一摺直隸元城縣境衛河與山東館陶接壤向有紅花隄一道以禦漳衛二河北來之水嗣因漳河南徙水無倒灌其隄段久已殘廢迨復經修建後上年豫省漳河漫水下流由大名元城直達紅花隄潰決隄埝由館陶注入衛河若將漫口堵築恐滲水無從疏洩元城縣北鄉村莊皆成澤國若不築復則館陶縣村莊又受

其害事關兩省民田廬舍必須熟籌妥議以資經久著派大學士戴均元馳驛前往該處確切勘辦務令兩無妨礙方爲盡善至內黃縣屬袁村地方因缺口多年將地畝刷成河形見在鹽運商民各船隻均以寶公河淤塞改從新刷河道行走有無阻礙並著詳加查勘後順道赴河南會同程祖洛將漳水見復東漫民埝不能捍禦宜如何設法宣洩以利修防之處悉心籌議據實具奏○己巳命浙江暫弛海禁招商赴臺販米○壬申命浙江平糶倉穀○癸酉免領運奉天賑米船帶商米二成稅○乙亥諭和孝固倫公主朕之姑也自幼仰承 皇祖高宗純皇帝鍾愛最篤嘉慶年間 皇考仁宗睿皇帝疊加 恩眷至爲

優渥本年春閒遘疾朕屢次遣人存問方期剋日就痊茲聞薨逝實深憫惻著賞給陀羅經被派惇親王帶領侍衛十員卽日前往奠醊朕於本月十四日親臨賜奠所有喪事一切官爲經理並派廣泰在彼妥爲照料以示優卹○丁丑永定河漫口合龍○以黃鳴傑爲浙江布政使調吳榮光爲湖北按察使以伊里布爲浙江按察使

由山西冀甯道遷

○調嵩溥爲江西布政使潘恭辰爲廣西布政使○辛巳撥部庫及江蘇

各庫銀一百萬兩備江蘇賑需○壬午 上奉 皇太后啓鑾謁 西陵○免經過地方額賦十分之三

○丙戌 上謁 泰陵 泰東陵 昌陵回鑾○丁亥免直隸通州等二十七州縣水災額賦○己丑

上臨奠端悃固倫公主園寢及故大學士朱珪墓○ 上奉 皇太后還京師○庚寅命五城飯廠加米

煮賑○賜故大學士朱珪曾孫甘霖舉人○壬辰諭軍機大臣等戴均元奏查勘直隸元城縣北境紅花

隄見在內外地畝全行涸出業經補種麥苗據戴均元率同該道府等逐加履勘有大缺口一處約長四十丈係上年漳河漫水沖缺其餘歷年漫開大小缺口尙有六七處惟漳河上游從何處漫缺下注必須將來路究明方可疏治著戴均元於馳抵河南安陽縣後會同程祖洛親歷上下確切查勘應如何設法籌辦據實奏明辦理至元城境內引河一道由府城東南隅至何家莊穿隄入衛河身窄狹易於衝潰該民人情願自行改挖著知會直隸總督卽飭元城縣將河身挑直量加展寬以暢其流其紅花隄缺口下有新刷水溝由館陶之徐家倉入衛五百餘丈該處地勢較窪著將溝槽挑成河道以期分流洩水並建築東西兩隄俾免旁溢其開溝築隄之處皆係民田著覈計地畝豁免錢糧給還地價需用公費卽飭該管知府確估借帑興修事竣攤徵還款○以松筠爲吉林將軍穆彰阿爲左都御史調裕恩爲戶部左侍郎奎照爲吏部右侍郎以多福爲刑部右侍郎

由左副都御史遷

○是月賑直隸通州等四十州縣山東臨清等

五州縣水災加賑江西德化縣湖北黃梅縣河南武陟等五縣水災給江蘇儀徵等四縣湖北江陵等三縣水災口糧並修屋費蠲緩山東臨清等十六州縣衛直隸薊州等五十州縣水災新舊額賦河南武陟縣湖北黃梅縣水災額賦及屯坐各衛應徵新舊額賦並給修屋費緩徵江西德安等十三縣額賦直隸昌平等三十州縣新舊糧租長蘆被水課銀展緩齊齊哈爾等四城應還貸糧

冬十月癸卯諭戴均元等奏會勘新刷衛河一摺前因內黃縣袁村地方將地畝刷成河形見在鹽運商

民各船均改從新河行走經朕特派大學士戴均元會同程祖洛將有無妨礙之處詳加查勘茲據奏稱衛水向係經寶公河下注因漳水挾洄而來將衛水頂阻旁決袁村今漳水業經北趨改由慶豐莊歸入正河其寶公河上游止係洄水較前此漳洄合流衝衛情形迥異衛水自袁村決口刷有河槽則漳衛分流輕減水患實爲可乘之機自應通籌全局開治新河惟衝刷處所閒有淤淺兩岸亦恐旁溢應行挑挖深通並築隄捍衛著一併相機妥辦其瓠子觜東岸溝形一道偶遇漲水卽由龍王廟地方歸入正河著於該處築鉗口壩夏開冬閉以備宣蓄惟內黃縣境東袁村等村漫水穿村行走居民難免浸灌著於東袁村大晁村疏濬支流將村口正流堵塞其大杜村之水無支流可引著於該村前後築隄捍衛旁溢支流悉行堵閉使全溜俱歸正河所有新河經由處所除直隸境四十餘里黃河故道本無錢糧外其餘行糧民地久經水衝沙壓雖未咨請豁免而歷年錢糧多係緩徵著自道光三年爲始將河身所占地畝應徵錢糧並前此歷年緩徵錢糧均確查題請豁免其築隄占用民地亦著照公占田地之例給予地價工程經費見據該商等呈請捐輸著直隸總督長蘆鹽政會同程祖洛委員確查籌辦俾衛河久遠暢行以奠民居而利商運○己酉以武隆阿爲內閣學士兼禮部侍郎銜前任西甯辦事大臣○撥安徽關稅及捐監銀十萬兩並本省耗羨銀備無爲等三十三州縣衛賑需○辛亥撥龍江等關稅銀三十三萬兩備江蘇太倉等四十七州縣衛賑需○壬子分青海蒙古河北二十四旗爲左右翼每翼添設正副盟長各一每六旗

設扎奇噶克齊一每三旗設梅楞一每旗設扎蘭一○癸丑內閣學士徐頤以病免○甲寅帥承瀛奏浙商捐銀備賑 上不許仍准應完各款加展五綱○撥浙江運庫銀三十萬兩備海甯等二十州縣衛賑

需○乙卯賜張從龍等五十三人武進士及第出身有差○丙辰加恩舊學贈故內閣學士徐頤侍郎銜予祭葬賞其子綸舉人○添設河南睢甯廳蘭陽汛額外委一○庚申諭戴均元等奏會勘漳河漫口迤下情形設法籌辦一摺治水之法合則爲患分則安流漳河性本湍悍自乾隆五十九年由三臺村南徙合洹以來衛水爲其頂阻漳與洹每值夏秋同時異漲民埵不能捍禦以致安陽內黃迤下各處頻年衝決此合則爲患之明證茲據戴均元會同程祖洛前往周歷履勘衛水由袁村迤東衝刷成河經百六十餘里至大名縣之岔河背而後與漳合洹水復由原路獨行百餘里至楚旺而後與漳合見在漳河北徙雖無一定河槽業已分殺水勢自當爲因勢利導之計著照所請於樊馬坊馮馬坊陳家村湘河河幹各處北岸支流築作柴壩堵截使河幹迤上分流歸併一處田市北岸水高南岸一尺有餘卽就高灘挑挖引溝一道俟漫水消涸再將辛莊一帶漫灘之水勘明築壩堵閉完密以資直隸大名等處捍衛其梗阻河心之田家營等十處南北兩岸迎溜處所編設柴霸以護民居北岸上游商家村孫陶集兩處壩工卑薄卽飭鑲修高厚並加築挑壩土格以期穩固自柴村橋起跨壓新淤河形接連洹河北岸民埵建築土埵一道再將舊民埵培厚加高樊馬坊迤下南岸王家口築作土格土壩以免串流南趨使漳洹不至

再合所需工料著程祖洛飭勘確估設河勢再有變遷見在擬辦工程有應量爲增減者隨時奏明辦理一切經費先由司庫借項興修事竣攤徵歸款河身所占地畝應徵錢糧卽飭地方官查明照例題請豁免至修隄築壩事宜著河北道鄒錫濬往來稽察懷慶府知府王康父總司其事妥爲督辦前任汝甯府知府王世臣常駐工所會同該府督飭該縣及工員等實心經理務於明歲春融趕緊興辦限四月內完竣仍俟新河行走一年後該撫審度形勢如尙有當修治之處再行奏辦○壬戌以那丹珠爲左副都御

史由太僕寺卿遷

○以糜奇瑜爲太僕寺卿吳榮光爲貴州布政使宋如林爲湖北按察使

由浙江鹽運使遷

○是月賑

湖北江陵等三縣衛水災並免新舊額賦給修屋費貸奉天錦州旗民山東武城縣水災一月口糧直隸天津鎮三營及紫荆關各汛被水兵丁銀米緩徵安徽無爲等四十二州縣江蘇高郵等二十九州廳縣山東濟甯等七州縣衛新舊額賦奉天甯海縣歉收本年額賦湖北沔陽等十一州縣及屯坐各衛新舊額賦山西五臺縣水災春借倉穀兩淮安豐等九場歉收竈課並應還貸糧

十一月丙寅以惠顯爲福建布政使調齡住爲安徽按察使以盧元偉爲山西按察使

候補四品京堂

○辛未裁

貴州普定縣屬土千總二土把總五○乙亥以成格爲刑部左侍郎毓岱爲廣西巡撫

病痊

○庚辰再撥

銀二十餘萬兩備直隸賑需○丁亥諭定例冊封皇貴妃貴妃俱祭告

太廟後殿

奉先殿封嬪無

告祭之文向來翰林院恭擬告祭文內有冊封嬪文係照成案辦理於成例未能相符嗣後封嬪不必告

祭卽與妃同日冊封亦無庸將封嬪告祭著爲令○諭戶部軍需局係因辦理軍務而設此時自無庸設立專局著照戶部所議將該部軍需局裁汰一切檔案酌量分派陝西山西二司承辦以復舊制其嘉慶年間軍需未結各案亦責成兩司司員上緊清釐以銷塵牘而重帑項○申定廣東福建捉人勒贖治罪例○免山東海販奉天雜糧稅○己丑晉封和嬪那拉氏爲 和妃 全嬪鈕祜祿氏爲 全妃祥貴人

鈕祜祿氏爲 祥嬪○辛卯敕諭哈薩克汗愛畢勒達曰昨據伊犁將軍奏爾遣弟占圖喇蘇勒坦呈遞回字文稟內稱爾父瓦里蘇勒坦上年病故爾父喪事完畢卽遣爾弟占圖喇蘇勒坦等呈報事故恭進貢馬並爾父故後哈薩克等衆公議願爾承襲汗爵因未奉諭旨不敢稱汗祈朕矜恤施恩等語朕聞爾父身故甚爲軫惜爾祖爾父均屬恭順仰受朕恩茲爾父身故爾雖管轄哈薩克等衆因無朕旨不敢稱汗特遣爾弟占圖喇蘇勒坦稟稱衆皆願爾爲汗請朕諭旨尙屬出於至誠實堪嘉尙汗爵係爾祖父所遺爾父在時爾卽幫辦遊牧事務屬下哈薩克等均皆敬服爾能約束伊等朕所確知特命大臣齎去銀紙等物賜奠爾父爾父汗爵加恩卽著爾襲封錫以詔書爾接奉此詔惟當感戴朕恩哈薩克等衆留心妥爲管束友睦子弟勿生事端肅清邊陲嚴拏盜匪和輯鄰封凡一切事務悉聽伊犁將軍塔爾巴哈台參贊指示妥爲辦理不可絲毫冀倖取巧爾果能如爾祖父勤恪朕必倍加優眷爾宜欽遵恩旨以期萬萬年永受朕恩欽哉勿怠今因頒詔賞爾大段四匹齎到祇領再據伊犁將軍轉奏爾遣爾姪阿布賚蘇

勒坦伊弟丕噶伊里蘇勒坦等祈將爾故兄阿帕斯蘇勒坦公爵恩賞阿布賚蘇勒坦承襲等語此公爵係爾祖父宣力多年 特恩賞給並非世襲今阿帕斯蘇勒坦病故理應停襲惟念爾姪阿布賚蘇勒坦遠遣伊弟丕噶伊里蘇勒坦等恭請朕安並進貢馬尙爲恭順將此公爵卽賞阿布賚蘇勒坦承襲此係朕矜恤外藩恩施格外不可爲例將此明白曉諭爾姪阿布賚蘇勒坦知之特諭○是月貸甘肅靜甯等十六州縣災民口糧蠲緩湖南澧州等五州縣水災甘肅宜禾縣旱災新舊額賦緩徵江蘇太倉等二十一州縣廳衛水災甘肅靖甯等十三州縣歉收新舊額賦熱河歉收莊頭差米十分之三山東臨清等處被災引課及加價銀奉天各城兵丁應還倉穀

十二月辛丑裁貴州長寨同知所屬中順里土外委○壬寅調訥爾經額署安徽按察使以劉斯崐爲山

東按察使

由浙江鹽運使遷

○以內閣學士武隆阿爲直隸提督○乙巳添設京城南鄉飯廠養賑○以白鎔爲

內閣學士兼禮部侍郎銜

由詹事遷

○庚戌以辛從益爲禮部右侍郎

由內閣學士遷

○甲寅諭前據松筠奏雙城堡

屯田情形請先移駐在京閒散宗室並以雙城堡原議移駐京旗閒散查有盛京養息牧及大凌河二處均可籌辦移駐本日軍機大臣會同宗人府議奏宗室分駐吉林散處各屯諸多窒礙並據晉昌奏查明養息牧大凌河二處牧廠荒地勢難再議開墾各等語養息牧大凌河二處牧廠試墾不便情形嘉慶年間屢奉 皇考仁宗睿皇帝諭旨駁飭彼時松筠曾以此被議卽不應於此時再行瀆奏且松筠見任吉

林將軍實屬越俎該將軍固執前見不顧事理之是非意在必行其說所奏尤爲荒謬松筠著交部議處
○賞和孝公主子輕車都尉富那二品頂帶○以陝西南山地方安靜加陝安道嚴如煜按察使銜○改
江蘇淮安府檢校爲清河縣巡檢○濟直隸通惠河○乙卯諭御史王世綬奏請嚴京察一摺國家黜敘
官方三載考績爲激揚之大典朕恭讀嘉慶五年十一月 皇考仁宗睿皇帝特諭近年以來六部堂官
所拔識之司員大率以迎合己意者爲曉事之人以執彙剖辨者爲不曉事之輩以每日樞謁卑詞巧捷
爲勤慎以在司坐辦口齒木訥者爲迂拙遂致趨承卑鄙乞憐昏夜白晝驕人仕路頽風幾不可問朕思
轉移風氣之方須立矜式觀摩之準見已將屆京察之期各部俱應慎重選舉以公心辦公事勿存絲毫
私意問心無愧斯可對君此旨著通行曉諭各錄一通懸於公署朝夕觀覽等因欽此 聖訓煌煌至爲
詳備部院各堂官果能實力奉行自可黜陟允當朕卽再降旨申諭亦不能出 聖諭之範圍如該御史
所奏歷屆京察有出任道府督撫撤令回京者堂官薦之於前督撫劾之於後或保或參互相矛盾此言
未嘗不是然猷守兼優者固屬攸往咸宜其資格較久謹愿樸實之員原有部務熟悉而初膺外任未必
裕如者朕屢飭直省督撫隨時甄別原非一經薦舉卽不復加以參劾也其衰庸各員該堂官等自應嚴
加甄汰儻憐其衰憊特予矜全曲徇人情好爲姑息一經發覺惟該堂官是問至所稱候補各員有才堪
造就不妨試以吏案策勵使前似爲得人起見然候補人員於臺案事件原應一律講求以期熟悉至補

缺先後挨次敘用自有一定成例各衙門有例可循尙恐堂官以愛憎爲取舍不盡公允若妄更成例越次揀選名爲鼓勵人才實以開奔競之門躁進者遂捷足先得守分者必致補缺無期此端一開流弊滋甚所奏斷不可行至各員簡擢外任或因貪劣被參原保各官吏部本有處分定例亦無庸更立科條也

○召廉敬來京以蘇成額爲山西布政使鄂山爲河南按察使

由陝西糧道遷

○丁巳和桂緣事降調調博啓圖

爲倉場侍郎轉舒英爲禮部左侍郎調明志爲禮部右侍郎以色克精額爲理藩院右侍郎

由內閣學士遷

○張

映桂緣事降調調顏檢爲倉場侍郎顧皋爲戶部右侍郎顧德慶爲工部右侍郎轉朱士彥爲兵部左侍

郎以賈允升爲兵部右侍郎

由左副都御史遷

○戊午諭松筠於盛京養息牧大凌河二處牧廠不便試墾之地

固執前見率行瀆奏並自請前赴盛京會勘籌辦實爲越俎荒謬部議降二級調用本屬咎有應得姑念

其究係因公松筠著加恩改爲降二級留任不准抵銷○詳德以病免調宋如林爲貴州按察使以王惟

詢爲湖北按察使

由浙江鹽道遷

○庚申調訥爾經額爲山東按察使劉斯崐爲安徽按察使○辛酉諭回子阿

布都哈里從前曾經賞給原任大學士傅恒使令今平定回疆已越多年各回子王公等俱極恭順出力

著加恩將阿布都哈里及伊子博巴克阿布都色默特伊孫阿錫木俱著賞給馬甲錢糧入於正白旗蒙

古當差○召陳若霖來京命戴三錫以二品頂帶署四川總督調陸言爲四川布政使以福綏爲直隸布

政使董淳爲直隸按察使

由通永道遷

○是月貸江蘇蘇州等五府州駐紮災區兵丁銀米緩徵浙江秀水等

七縣災民口糧湖南安鄉縣被淹湖田額賦展緩雲南被水竈課○是歲朝鮮琉球暹羅緬甸來貢○會計天下民穀數除直隸武清等三十一州縣江蘇福建臺灣等處未經咨報外各省通共大小男婦三千七百七十五萬三千一百二十二名口各省通共存倉米穀三千四百八十九萬六千六百六十六石七斗五升四勺